



Rabu, 29 Mei 2024

Ogen: Imamat 19:32



Mehamat Man Sienggo Metua



Ibas kita ndalani kegeluhen, melala kal kita ngaloken kata pengajaren. Sabap arah pengajaren me maka kita nggeluh ratur, la si ate-ate, si ergan sada ras sidebanna. Nandangi kalak Jahudi pe, tetap isehken Dibata arah Musa kerna aturen ntah pe undang-undang, kusus i bas pasal 19 e me undang-undang kerna kebadian ras keadilan. Melala kal aturen si ipeseh i jenda kerna kai si la banci ilakoken janah kerna kai si si arus ilakoen bangsa e. Kusus ayat renungenta paksa enda isehken maka arus mehamat nandangi kalak si enggo metua, la saja orangtuanta tapi kalak si enggo tuan asangkan kita. Janah enda sendalanan isuruh Dibata guna mpehaga IA. Sabap lit ka nge kalak mehamat man orang tuana tapi la arah e ipehagana Dibata. Kalak si enggo metua enggo melala ngenanami pengajaren janah paksana ia nehken pengajaren e man kesusurena. Janah tanda kehamaten man kalak si enggo metua e me megiken ras ngelakoken si iajarkenna e.

Wari enda e me peringeten wari lanjut usia (Lansia), secara nasional, enda i bas sejarahna, icanangken i bas tanggal 29 Mei 1996 i Semarang, guna nginget ras ngergai orangtua si nai ikut guna kemerdekaan Indonesia. Tanggal 29 Mei, i je sidang persiapan guna kemerdekaan Indonesia si ipimpin Dr. KRT Radjiman Widyodiningrat, aminna umurna enggo metua dengen ia simetwana paksa e. Nginget lansia pe paksa e mbelin peranna i bas kemerdekaan Indonesia e maka ijadien tanggal enda jadi peringeten hari lansia secara nasioanal.

Genduari enda melala kal ilakoken program guna lansia, i bas gerejata igelari saitun. Megogo tempa ate adi iendekenna lagu 'si apa bilang lansia tidak berguna...' tempa-tempa i bas urak gegehna, daging kulana pe reh tuana lanai iakapna meherga dengen iergai ia. Rikutken renungenta enda mehamatlah kita.

☞ *Masa tua jadi sada kehagan janah kesempatan ngergai ia*